

Bosna i Hercegovina

Federacija BiH

Kanton Sarajevo

Skupština Kantona Sarajevo

44. Radna sjednica

ZASTUPNIČKA INICIJATIVA

n/p predsjedavajuće, prof. Ana Babić

Jedan od zaključaka Skupštine Kantona Sarajevo bio je da nadležni organi, Tužilaštvo Kantona Sarajevo i Uprava policije KS, u skladu sa svojim nadležnostima pokrenu procedure odgovornosti osoba koje su počinile određene propuste postupajući u predmetu Memić, te da o provedenim aktivnostima izvijeste Skupštinu Kantona Sarajevo.

Ad hoc tijelo Komisije za sigurnost Skupštine KS utvrdilo je nadzorom nad zakonitošću rada MUP-a KS i Uprave policije u predmetu "Dženan Memić" niz propusta koje su počinili policijski službenici radeći na tom predmetu.

Ovih dana imamo u medijima nevjerovatne informacije kako je Komisija za sigurnost Skupštine KS utvrdila da je doslo do zastare vođenja postupka.

Navodi se kako je postupak pokrenut, ali je istekom roka od jedne godine od dana počinjenja prekršaja zastarjelo vođenje disciplinskog postupka.

Nezavisni odbor je obavijestio javnost kako je izvršio analizu dokumentacije u vezi sa provođenjem unutrašnje istrage i disciplinske postupke protiv policijskih službenika Uprave policije MUP-a KS obuhvaćenih izvještajem ad hoc tijela za vršenje nadzora nad zakonitošću rada MUP-a KS u predmetu "Dženan Memić" te zaključio da u Upravi policije MUP-a KS vlada atmosfera nekažnjivosti i nezamjeranja.

Ono što je u ovom momentu gotovo pa nevjerovatno jeste da na slučaju koji ima tako veliku zainteresovanost javnosti imamo ovakvu degradaciju, zloupotrebu i nefunkcionalnost sistema.

Postavlja se pitanje kako to onda sve izgleda na manje interesantnim slučajevima?

Slučaj Memić je doslovno survao u provaliju povjerenje javnosti u policijske, tužilačke i pravosudne institucije sistema.

Međutim, posljednje špekulacije o politički instruisanom sistemskom zaboravu disciplinskih postupaka, predstavlja vrhunac otuđenosti institucija sistema od svoje primarne misije.

Ne želim vjerovati da sve ovo što gledamo, našu zajednicu sve više vodi u pravcu društvene anarhije, kada će ljudi zbog nepovjerenja u sistem, stvari početi uzimati u svoje ruke, što je najgore moguće rješenje kada je u pitanju sigurnost i pravda.

Zaključak Nezavisnog odbora KS u kojem predlaže Skupštini usvajanje izmjena Zakona o policijskim službenicima Kantona Sarajevo u pogledu odredaba o rokovima zastare kako bi se ubuduće izbjegle ovakve situacije i manipulacije sa disciplinskim postupkom i rokovima zastare disciplinskog postupka, predstavlja aktivnu mjeru za buduće postupke ali nas sve zajedno ne oslobađa obaveze da utvrdimo odgovornost za aktuelni slučaj.

Rok očigledno u ovom slučaju nije sporan i bio je zasigurno dovoljan da je postojala iskrena namjera da se postupak pošteno provede..

Ukoliko imate namjeru da zataškate, i to prode nekažnjeno, onda vam niti jedan novi rok neće biti rješenje.

Ovdje je vrlo važno utvrditi stvarne činjenice i pojedinačnu odgovornost, prije svega kao pedagošku mjeru za buduće procese a i šansu za kakav takav povratak kredibiliteta institucija sistema koji je survan u javnosti.

Zbog svega navedenog tražim od svih nadležnih institucija (Nezavisni odbor, Uprava policije, i Tužilaštvo) da dostave informaciju Skupštini KS o pokrenutim nadležnim postupcima i rezultatima istih, eventualnim zastarama disciplinskih postupaka, razlozima zastare, te odgovornim osobama za propuštene postupke.

Sarajevo, 06.09.2018.

Segmedina Srna Bajramović
zastupnica SDP BiH u SKS